

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U ZENICI  
Broj: 43 0 St 268646 25 St  
Zenica, 21.04.2026. godine

Općinski sud u Zenici, stečajna sutkinja Sanja Pavlić, u stečajnom postupku koji je pokrenut po prijedlogu predlagatelja "RTV MAGLAJ" društvo za proizvodnju, prenos i emitovanje programa d.o.o. Maglaj, Viteška b.b., koga zastupa Mahir Čaušić, direktor društva, MBS: 43-01-0488-09 (stari broj-1-6716), odlučujući o prijedlogu stečajnog dužnika, donio je van ročišta, 21.04.2026. godine sljedeće:

## R J E Š E N J E

OTVARA SE STEČAJNI POSTUPAK nad imovinom stečajnog dužnika "RTV MAGLAJ" društvo za proizvodnju, prenos i emitovanje programa d.o.o. Maglaj, Viteška b.b., glavni račun stečajnog dužnika otvoren kod SPARKASSE BANK d.d. BiH, broj: 1990460003246881, dana 21.04.2026. godine u 15:00 sati.

Za stečajnog upravitelja, sa liste stečajnih upravitelja, imenuje se Goran Bojanović, Sejmenska 17a, Zenica.

Pozivaju se vjerovnici da u roku od 30 dana od dana objave ovog rješenja u „Službenim novinama“ Federacije BiH, prijave svoje tražbine koje imaju prema stečajnom dužniku podnošenjem prijave Općinskom sudu Zenica na broj: 43 0 St 268646 25 St, uz uplatu sudske takse u iznosu od 1% od vrijednosti tražbine, ali ne manje od 50,00 KM, niti više od 10.000,00 KM na račun budžeta ZE-DO kantona broj:134-010-0000001672, vrsta prihoda 722221, budžetska organizacija 1606001, općina 103.

Podnositelji prijave uz prijavu trebaju navesti svoju firmu, sjedište, boravište, pravni osnov i iznos tražbine, kao i broj svog računa kod poslovne banke.

Pozivaju se vjerovnici da stečajnog upravitelja u roku od 30 dana obavijeste koja prava osiguranja potražuju na predmetima i imovini stečajnog dužnika, navođenjem predmeta nad kojim se potražuje pravo osiguranja, vrstu i razlog nastanka prava osiguranja, kao i osiguranu tražbinu.

Pozivaju se dužnici stečajnog dužnika da svoje obveze bez odlaganja izmire.

Nalaže se stečajnom dužniku i trećim osobama da stečajnom dužniku predaju u posjed imovinu i dokumentaciju stečajnog dužnika koja je u njihovom posjedu.

Nalaže se registru poslovnih subjekata ovog suda da uz firmu ili naziv stečajnog dužnika izvrše upis oznake „u stečaju“, a u rubrici „Lica ovlaštena za zastupanje subjekta upisa“ umjesto imena i prezimena direktora, upišu ime i prezime stečajnog upravitelja.

Nalaže se zemljišnoknjižnim uredima i nadležnim katastarskim operatima, kod kojih se vode nekretnine stečajnog dužnika, da izvrše upis rješenja o otvaranju stečajnog postupka.

Ispitno i izvještajno ročište u ovom postupku zakazuje se za dan 09.07.2026. godine u 12,00 sati, u zgradi Općinskog suda Zenica, te se na isto pozivaju vjerovnici stečajnog dužnika koji podnesu prijavu tražbine, kao i stečajni upravitelj.

Rješenje o otvaranju stečajnog postupka objavit će se na oglasnoj tabli suda, web stranici suda-elektronskoj tabli suda, na internet stranici FIA-e, a u „Službenim novinama“ Federacije BiH objavit će se izreka rješenja.

## O b r a z l o Ź e n j e

Društvo "RTV MAGLAJ" društvo za proizvodnju, prenos i emitovanje programa d.o.o. Maglaj, Viteška b.b., koga zastupa Čaušić Mahir direktor društva, podnijelo je prijedlog za provođenje stečajnog postupka 08.12.2025. godine.

Privremena stečajna upraviteljica je na ročištu za utvrđivanje uvjeta za otvaranje stečajnog postupka održanom 02.04.2026. godine, izjavila da ostaje kod izvještaja koji je dostavila sudu, te da je u postupku izrade izvještaja imala kontakte sa direktorom Čaušić Mahirom, sa blagajnikom Čajić Fahirom, te ostalim radnicima stečajnog dužnika i knjigovodstvenim servisom Esmā koji vodi poslovne knjige "RTV MAGLAJ, d.o.o. Maglaj, zatim načelnikom Općine Maglaj Suljaković Maidom. Izjavila je da Popis imovine na dan 31.12.2025. godine nije vršen i na upit da li imaju popis od ranijih godina rekli su da isti nisu ni sačinjavali, da je RTV MAGLAJ, d.o.o. Maglaj redovno poslovalo i izmirivali su svoje obaveze dok na prinudnu naplatu nije došlo Rješenje o pokretanju postupka prinudne naplate

Porezne uprave Federacije BiH u iznosu od 555.098,11 KM, nakon čega je direktor donio Odluku o prestanku poslovanja, ali da stečajni dužnik i dalje vrši registriranu djelatnost radi prijetnje gubitka dozvole od Regulativne agencije za komunikaciju, a sve u nadi da će sa otvaranjem stečajnog postupka pojaviti kupac koji će se dogovoriti sa stečajnim vjerovnicima za prodaju RTV MAGLAJ, d.o.o. Maglaj. Navela je da u poslovnim knjigama RTV MAGLAJ, d.o.o. Maglaj, ima tražbine u iznosu od 116.062,00 KM, također da RTV MAGLAJ d.o.o. Maglaj ima ukupne obveze u iznosu od 825.687,00 KM prema Bilansu stanja na dan 31.12.2025. godine. Izjavila je da društvo RTV MAGLAJ, d.o.o. Maglaj ima otvorena dva računa: u SPARKASSE BANK D.D. – glavni račun 1990460003246881, blokiran račun od 27.11.2025.godine, Asa Banka d.d. Sarajevo 134060000012317, blokiran račun od 28.11.2025.godine, te da u radnom odnosu kod RTV MAGLAJ, d.o.o. Maglaj je pet radnika na dan 02.04.2026.godine. Navela je da prema dopisu - Podaci Porezne uprave Federacije BiH, Porezne ispostave Maglaj od 13.02.2026. godine RTV MAGLAJ, d.o.o. Maglaj ima duga po osnovu javnih prihoda u ukupnom iznosu od 570.972,15 KM, a obveze prema Upravi za indirektno oporezivanje BiH RTV MAGLAJ, d.o.o. Maglaj su izmirene zaključno sa 31.12.2025. godine, za zadnji mjesec PDV-e je platio direktor vlastitim sredstvima.

Privremena stečajna upraviteljica je izjavila da je stečajni postupak pokrenut u roku od 60 dana od dana nastupanja platežne nesposobnosti, te da na osnovu svega navedenog prolazi da je imovina stečajnog dužnika dovoljna da se pokriju troškovi stečajnog postupka, da stečajni dužnik ne može nastaviti poslovanje jer od 27.11.2025. godine ima blokiran račun, da trenutne obaveze izmiruje direktor vlastitim sredstvima, da postoje razlozi za otvaranje stečajnog postupka iz razloga platežne nesposobnosti stečajnog dužnika i to u neprekidnom trajanju dužem od 60 dana. Navela je da je Prijedlog za otvaranje stečajnog postupka podnesen od ovlaštenog lica od strane direktora, te da u skladu sa naprijed navedenim je mišljenja da je prijedlog dopušten i osnovan, da su se stekli zakonski razlozi za otvaranje stečajnog postupka nad pravnim licem RTV MAGLAJ, d.o.o. Maglaj definiranim članom 6. Zakona o stečaju.

Na ročištu održanom 20.04.2026. godine, privremena stečajna upraviteljica je izjavila da ostaje kod izvještaja koji je dostavila, te da u poslovnim knjigama RTV MAGLAJ, d.o.o. Maglaj ima potraživanja od kupaca u iznosu 99.183,46,00KM, a ona koja nisu zastarila za naplatu iznose 8.009,56 KM. Izjavila je da RTV MAGLAJ, d.o.o. Maglaj ima ukupne obveze u iznosu od 825.687,00KM, prema Bilansu stanja na dan 31.12.2025. godine, a prema dopisu Podaci Porezne uprave Federacije BiH, Porezne ispostave Maglaj od 13.02.2026. godine RTV MAGLAJ, d.o.o. Maglaj ima duga po osnovu javnih prihoda u ukupnom iznosu od 570.972,15 KM.

Zakonski zastupnik predlagatelja je na ročištu izjavio da ostaje kod prijedloga za pokretanje stečajnog postupka i da nema primjedbi na Izvještaj privremenog stečajnog upravitelja i na Dopunu Izvještaja privremenog stečajnog upravitelja.

Sud je nakon uvida u dokaze priložene u spis, kao i u Izvještaj i Dopunu Izvještaja privremenog stečajnog upravitelja odlučio kao u izreci.

Sud je pored navedenog ovim rješenjem odredio dan i sat otvaranja postupka, imenovao stečajnog upravitelja sa liste stečajnih upravitelja, pozvao vjerovnike stečajnog dužnika da prijave tražbine i vjerovnike sa pravom osiguranja da obavijeste stečajnog upravitelja o svom pravu, te dužnike stečajnog dužnika da bez odlaganja izmire svoje tražbine, te je odredio i dan i sat za koji je zakazano ispitno i izvještajno ročište, a sve u skladu sa odredbama čl. 104., 105., 106., 107. i 108., Zakona o stečaju (Sl. Novine F BiH 53/21 i 19/25), budući da je naprijed navedeno i potrebno da sadrži rješenje o otvaranju stečajnog postupka.

#### PRAVNA POUKA

Protiv ovog rješenja stečajni dužnik može uložiti žalbu u roku od 8 (osam) dana po prijemu rješenja Kantonalnom sudu Zenica, putem ovog suda.

Stečajna sutkinja  
Sanja Pavlič